



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 3

Vietnam lenir To Lam-i tir election kokogo

Pak-i Kolkata amaktsü amomerenba atema Rajnath-i telangzüba agütsü

VOL. XXIII ISSUE NO. 174 (ADOK 174) DIMAPUR RASEMNÜ (WEDNESDAY) RONGCHII (APRIL) 08, 2026

₹ 5.00

Dimapur nung DTO Complex tasen lapokogo

Dimapur, April 7, 2026 (TYO): April 7, 2026 nü ISTT Complex, Dimapur anasa Model Colony, Purana Bazaar nung District Transport Office (DTO) Complex tasen lapoktsüogo.

Iba office ya Transport & Technical Education Advisor Temjenmenba-i lapoktsü. Iba Office Complex tasen lapokba ya transport administration aser public service delivery tajungba akümba nung tongtipang mera ka lir ta pai ashi.

Ki tasen renemba sülen department aser staff-i public ajangzüksü atema inyaktsüla. Nagaland sorkar atema revenue bener aruba department rongnung Transport Department ya lir aser iba department ajanga rongsenketzüng aser public administration nung tongtipang shilem agir ta Advisor Temjenmenba-i ashi.

Pai department staff dang public teyari bushia arudang timi yaritsü aser mapang shitak nung parnok mapa temtsütsü ayongzük.

Paisa NST General Manager dang iba ki tasen yanglutsü atema ali mulungsoa tenlaba atema pelaba metetdaksü.

Transport Commissioner lenisüba kübok Transport Department ajanga mapa tajung ka inyakogo aser contractor-ia jelia yangluzükba atema tenüngsang agütsür ta Temjenmenba-isa metetdaksü.

Iba office ya driving licences aser registration certificates agütsüba dang masü saka office nungi adokba data ajanga department maparen ulushia aotsüsa inyaktsüla ta paisa ashi.

Nagaland nung revenue-generating department tanabubaji Transport Department lir anungji ketdangsurtemi nüma tanga inyaktsüla aser department tashi

itshitsü atema merangtsü ayongzükere ta Advisor-isa metetdaksü.

"Iba office lapokba ya konang aser tepela mapang ka lir kechiyong ki tasen ka lapokba dang masü saka nübor tajungba nung tenzüksü tenangzükba agishiba lir" ta Commissioner & Secretary, Transport, Robert Longchari-ia ashi.

Iba facility tasen ajanga department-i service delivery tajungba akümer. Iba complex tasen ajanga modernization, better infrastructure & commitment to excellence mangdang sayur ta paisa ashi.

Nagaland nung revenue teimtiba bener arubaji Taxes Department lir aser parnok sülen Transport Department lir anungji public service delivery atema dang masü saka revenue generation atema temulung agüja inyaktsüla ta Longchari-isa metetdaksü.

Iba mapatong ya 19,200 square feet (0.44 acres) nung Rs 499.86 lakh endoka yangluogo ta Executive Engineer, NST, Er. Renben Kikon-i ashi.

Iba mapa ya M/S Noel Ayemi, Class-I Contractor nem ita 36 nung renemtsü atema agütsü. July 3, 2023 nungi mapa tenzükba ita 28 jelia October 2025 nung renema liasü ta Er. Renben-isa ashi.

Sentong nung Sumi Baptist Church, Purana Bazaar, Dimapur Pastor Hukato Sema-i temoatsü meshia sarasadem, Additional Transport Commissioner, Nagaland, Keneingunuo Clara-i tesentepertem pelaa agizük, Transport Commissioner, Nagaland, Elias T. Lotha-i mapatong indang osang tatsüka lemsatep aser District Transport Officer, Dimapur, Bendangtola Longkumer-i anküp tepela o jembi.

Assam Rifles DG-i Governor aser CM den ajurutepe

Dimapur, April 7, 2026 (TYO): Director General Assam Rifles Lt Gen Vikas Lakhera, AVSM, SM-i Nagaland Governor Nand Kishore Yadav aser Chief Minister Dr. Neiphiu Rio na den ajurutepego.

April 7, 2026 nü Lt Gen Vikas Lakhera-i Governor aser Chief Minister na den ajurutepebaji civil-military engagement akangshitsü aser Assam Rifles o state tsüngda amalitep tajungba alitsü atema liasü.

Lt Gen Vikas Lakhera-i Assam Rifles renema aliba, arrtsülen terenlok maparen

inyakba aser community outreach programmes tuluba inyaktsü indang tebilembatem lemsatapa liasü.

Governor Yadav aser Chief Minister Dr. Rio naprongi Assam Rifles ajanga maparen inyakba atema tenüngsang agütsü.

Assam Rifles-i security, regional development aser welfare activities inyakba atema tenati tenüngsang agütsü aser külemi teka amteper terenlok, disaster management aser lanur tashi itdaksütsü maparen inyaka aotsü tayongzükba agütsü.

Mkg DC & DEO-i candidate ajak den senden ka menogo



Dimapur, April 7, 2026 (TYO): Mongulbarnü Deputy Commissioner & District Election Officer Ajit Kumar Verma-i 28-Koridang Assembly Constituency nung candidate ajak jaoka senden ka menogo.

Senden nung Mokokchung DC & DEO-i candidate ajak by-election tiptema aser süngjema agütsü atema meranga inyaka aruba osang lemsatep.

Paisa candidate tem, parnok pusemertem aser 28 Koridang AC nung public dang District Election

ketdangpurtem den amalitepa yariteptsü aser Silent Period o Model Code of Conduct (MCC) sülen tashi angaa anidaktsü mepishia metetdaksüogo.

Iba senden nung Senior Superintendent of Police, Mokokchung, Returning Officer, Assistant Returning Officer aser candidate ajak aden.

28-Koridang Assembly Constituency by-election nung nisung ka asüba dülen security akangshio go aser additional company ka yokogo ta Kohima

nung Director General of Police, Rupin Sharma-i osangbener dang ashi.

Sepai talila Koridang constituency tongogo aser parnok züngsema Indian Reserve Battalion (IRB) company pezü den tanga security personnel mapa lenzükja lir ta DGP Rupin-i ashi.

Tensa tajungba kümogo aser iba constituency nung tesüiba nunga election mapang lendong balala ataloka aruba agi security maparen balala inyakdar ta paisa metetdaksü.

MoRTH-i Foothill Road ya National Highway jenjang nung ajungketa yanglutsü mulunga lir

Dimapur, April 7, 2026 (TYO): Trans-Nagaland Highway (Foothill Road) ya National Highway (NH) jenjang nung ajungketa yanglutsü atema Deputy Chief Minister T.R. Zeliang-i tanü senden ka ayonga menogo.

April 7, 2026 nü Capital Convention Centre nung senden amendang Nagaland nung National Highways Act, 1956 adopt asüba ajanga tetsükdaksü ajuruba onüktem benoka lemsatepogo.

Iba senden nung kin 16 tokelom den Chakhroma Public Organization aser Western Sumi Hoho züngsemtem aden. Parnok dak alia Foothill Road agi kongshiba district tem nugi teshimtet nübotem, Deputy Commissioner tem aser Nagaland Public Works Department (NPWD) ketdangsurtem aden.

"Iba senden ya Foothill Road project meyipa repringshitsü mesüra olemteptsü atema jatepba masü saka iba lenmang ya Ministry of Road Transport and Highways (MoRTH) kübok National Highway standards jenjang nung ajungketsü atema lir" ta Deputy Chief Minister TR Zeliang-i ashi.

Ministry-i iba lenmang yanglutsü aser linük nung tanga National Highways ama anepalutsü mulunga aliba shiogo ta pai metetdaksü.

Senden nung ali alizükba aser

temenok agütsüba indang onüktem benoka lemsatep. Taoba State policies ajanga National Highway projects atema ali melen temenok agütsüba nung timtem ajuru aser iba ya talisa 2018 nungi 2023 tsüngda ajurua liasü. Anungji State Cabinet-i November 2023 nung NH projects atema land compensation temelaba agütsütsü bangzüng renema ayu ajisüaka Article 371(A) den NH Act, 1956 medemdangba ajanga Ministry den ken o kar mebenet lir.

Ministry of Road Transport and Highways-i Trans-Nagaland Highway ya National Highway ka ama sangdongtsü aser yanglutsü mulunga lir saka iba atema state sorkari angati atema 30-metre Right of Way (RoW) agütsütsüla. Ajisüaka angati atema 30-metre RoW agütsütsüba ya tangbo inyaka moutettsü kechiyong Foothill Road atema 12 metres RoW dang agüja lir.

Tanü senden nung adenertemisa National Highways Act, 1956 ajanga Article 371(A) dak kongshira magizük tajungba ta ashi. NH Act ajanga tang beshiba State Act of 1965 den tajangzük teimba agütsür saka Article 371(A) dak kongshiba atema tebilemstü abener ta parnokisa ashi.

Senden nung MLA tem- C.L. John, Nuklutoshi, Achumbemo Kikon, Zhaleo Rio aser Namri

Nchang nungeria parnok tebilembatem lemsatep.

Parnoki nübortem dang Ministry-i nungdakba ama ali agütsütsü aser Nagaland nung lenmang tajung yanglutsü mepishia metetdaksüogo.

"Tang Foothill Road maparen nung kin teloktemi maneni amalitepa yaritsü ayongzükere. Technical ketdangpurtemi mapa inyakdang public teloktemi timtem magütsütsüla mesüra departmental inyakyim nung meinprong masütsüla" ta Minister Kaito-i ashi.

Kin telok kari NH-202 yangluba atema asüngdangdang Deputy Chief Minister-i NH Act, 1956 magizükba ajanga tetsükdaksü ajurur ta langzü.

Ano, DPR Consultant ka meshimba ajanga mapang atsülanger ajisüaka iba lenmang atema kanga merangdar aser tekaratiba nung ken o tem angatettepa mapatong atema senotsü angutsü ta TR Zeliang-isa ashi.

District Planning and Development Boards (DPDBs) kübok lenmang agi kongshiba yimtsüngtem den asüngdangteper 15-metre Right of Way (RoW) angati agütsütsü aser iba maparen ya anogo 15 tsüngda inyaktsü Deputy Chief Minister-isa tetuyuba agütsüogo.

Foothill Road district ajak nungi tezüluba nung iba ya anguba sülen Ministry dangi abentsü ta paisa ashi.



Lieutenant General Vikas Lakhera, Director General of Assam Rifles-i April 7, 2026 nü Lok Bhavan, Kohima nung Nagaland Ang Nand Kishor Yadav den ajurutepa liasü. Tena state nung security aser terenlok maparen dak sendakba indang jembi aser region nung Assam Rifles temi tensa azüoka tesunep nung yutsüba asoshi Angh-i tenüngsang agüja liasü.

Mission Karmayogi - Sadhana Saptah 2026 nüngtem nung sentong ayongzük

Dimapur, Rongchii/April 07 (TYO): Department of Information and Public Relations (DIPR) ajanga April 7, 2026 nü Mission Karmayogi - Sadhana Saptah 2026 nüngtem nung sentong ka DIPR Conference Hall, Kohima nung ayongzüka liasü.

Iba sentong nung MDO Leader, DIPR ajanga Mission Karmayogi nükjidong lemsatepba mapang iGot portal nung courses balala anguba indang ashi aser section balala nungi staff tem dang professional development tajungba akumtsü atema pei mapa den apet sentongtem nung shilem agitsü ayongzüka liasü.

Tanen makai angazüktsü nüngdakba indang lemsatepdang, sorkar aser nüburttem tsüngta tongtipang tesendaktep ka ama

department-i mapang wadang temaba jenjangi ajungkettsüla, ta MDO ajanga ashi.

iGOTKarmayogi platform nung training sentongtem nung shilem agiba ajanga officers aser staff tem shisatsü, inyakym aser service delivery tajungba akumtsü ta ashi.

Mission Karmayogi ya Government of India indang National Programme for Civil Services Capacity Building lir, koba civil services tem 'future-ready' aser 'citizen-centric workforce' kuma melenshitsuüsüa yanglua lir.

Iba sentong yagi sorkar inyakym 'rule-based system' nungi 'role-based, competency-driver framework' dangi melena lokti nükjidong aser linük teinyaktsü den apet angazüktsü nükjidong lir.

Iba yagi digital learning

ajanga tanen makai capacity building alitsü, civil servants tem nüburt tenzükba nung nüngdakba shisatsü, skills aser tashi adokdaksüba nung rangloker.

Sadhana Saptah 2026 ya April 2-8, 2026 anogotem Mission Karmayogi kübok mungyonga arur, koba Government of India ajunga nung capacity building tashi itshiba nung rangloker.

Iba yagi Ministries, Departments, Organisations aser State/Union Territories ka kuma lungjema angazükba aser terenlok indang yimya adokdaksür.

Iba sentong nung shilem ka ama sorkar mapa inyaker tem dang courses, thematic webinars aser danga inyakym ajanga ghonda pezü angazüktsü ajungshir.

IGNOU Regional Centre Kohima nung 39 buba Convocation agi



Dimapur, Rongchii/April 07 (TYO): Indira Gandhi National Open University (IGNOU), Regional Centre Kohima pur 39 buba Convocation sentong April 7, 2026 nü Kohima nung agia liasü. Iba sentong ya New Delhi nung IGNOU Convocation aliba den lirumedema agi, koba Vice President of India, C. P. Radhakrishnan-i moaka liasü.

Kohima Regional Centre nung candidates 801 nem degrees, diplomas aser certificates tem postgraduate, undergraduate, diploma aser certificate programmes tem nung agüja liasü.

Kohima Centre kübok tangazükter 801 temsüa liasü aser uangji Master's degrees angur 583, Bachelor's degrees angur 151, diplomas angur 25 aser certificates angur 14 liasü.

Convocation sentong nung candidates 240 shi aden aser parnok nem pei indang kulizüng kaket agüja liasü. National level nung learners 2,99,092 nem kulizüng kaket tem agüja liasü.

Dr. Shimray, Asst. regional

Director, IGNOU, Kohima ajanga pela agizükba o jembidang IGNOU-i National Education Policy 2020 den apet higher education nung 'equity, inclusivity, accessibility aser affordability' asoshi inyakba indang lemsatepa liasü.

Alima nung open university tulutiba, IGNOU ya NAAC ajanga A++ grade agüja lira ser NIRF kübok open university tematiba jenjang nung lir ta pai ashi.

Iba University yagi tang academic programmes 333 dak tema agütsür aser itemji armed forces nung alirtem aser bendang lima nung alirtemia agir ta ashi.

e-Gyankosh portal aser mobile applications densema pei sasa angazüktsü atema digital aser flexible learning sentongtem aser SWAYAM aser SWAYAM Prabha ama online education platforms tem University ajanga agütsüba indanga Dr. Shimray-i lemsatep.

IGNOU-i course shia registration nung atsüanem

akar, internships aser fieldwork ama practical components amshir aser SC/ST learners nem fee concessions lir, ta pai ashi.

Iba sentong nung tetushi tesemdang Rupin Sharma, IPS, Director General of Police, Nagaland ajanga jembidang, shisaluyim ya tanen maka aser degrees kisüng nung masü ta ashi.

Degrees yagi meranga inyakba sayur saka angazükba nung tatemala masü, anungji graduates temi angazüktsü tejangraba alitsüla ta ashi.

IGNOU ama reju temi shisaluyim nung tawa adoka aliba nung apu latsü aser angazüktsü maongka tuluba kumdaksü, ta pai ashi.

Meta talang nung alirtem densema tesem balala nungi angazükttetsüsa University sentong ajungba indang Sharma-i tenüng sanga liasü aser graduates tem dang maneni pei skills tajungba kuma lokti ainba nung shilem agitsü ayongzüka liasü.

Mokokchung DPDB senden April 14 nü amentsü

Dimapur, Rongchii/April 07 (TYO): Ita shia amenba Commissioner, Mokokchung, Mokokchung District Planning & Development Board senden April 14, 2026 anüngdang 11:00 Anungji züngse ajak iba ako nungi tenzükba Deputy Commissioner Mokokchung indang Conference Hall nung

Wokha nung teintet rogotem nem teyari oset lema agütsü



Dimapur, Rongchii/April 07 (TYO): Ministry of Social Justice and Empowerment, Department of Empowerment of Persons with Disabilities (Divyangjan) ajanga Department of Social Welfare aser District Administration Wokha den lungjemer Government of India indang ADIP aser RVY schemes kübok teyari oset angati lema agütsüba sentong ka April 7, 2026 nü Town Hall, Wokha nung ayongzüka liasü.

Iba sentong nung akhumdong ama Extra Assistant Commissioner Wokha, Sangmou Khiamniungan aden aser pai lokti dang lenmang sayuba nung teintet rogo temi shilem tajung agiba indang jembi aser arishi nung tain akumba ama shisatsü renloker aser lokti terenlok maparen nung parnok tongtipang lir ta ashi.

District Welfare Officer Wokha, C. James Ezung-ia iba sentong nung jembidang schemes indang rateta ashi aser teintet rogotem aser lemata-matar tem takum 'aids and assistive devices' ajanga

tajungba kumdaksüba indang jembia liasü.

Iba sentong nung teyari angur nisung 50 nem wheelchairs, wheelchairs with commodes, chairs with commodes, knee braces, lumbar belts, walking sticks, crutches, hearing aids, TLM kits for children with disabilities, silicon cushions, aser blind sticks amala agüja liasü.

Item oset lema agütsüba sentong ya categories ana kübok inyak - Rashtriya Vayoshri Yojana (RVY) scheme kübok teintet rogotem aser Assistance to Disabled Persons for Purchase/Fitting of Aids/Appliances (ADIP) scheme kübok lemata-matar tem.

RVY scheme yagi BPL category nung aliba teintet rogotem nem physical aids aser assisted-living devices tem agütsür, koba atema Government of India ajanga senotsü teyari ajunga agütsür.

ADIP scheme ya central sorkar sentong ka lir, aser yangji lemata-matar alirtem nem teyari balala agütsür.

Niuland nung Tree Plantation Competition ayongzük



Dimapur, Rongchii/April 07 (TYO): District Administration Niuland ajanga District Hub for Empowerment of Women (DHEW) aser Beti Bachao Beti Padhao (BBBP) den lungjemer Niuland nung April 6, 2026 nü Tree Plantation Competition nung takok angur sangdongba sentong ka Deputy Commissioner, Niuland indang Conference Hall nung agia liasü.

Iba sentong nung Kelengunuo Solo, EAC Niuland menden liasü aser lai libajen wazükba ayutsü nüngdakba aser iba amala maparen nung

nüburttemi shilem agitsü nüngdakba indang lemsatepa liasü.

Deputy Commissioner, Niuland, Sara S Jamir-i o tatsüka jembi aser takok angurtem sangdonga liasü.

Iba tetoktepba nung takok angurtem nem sempet agütsü asr maneni pei alidak environmental awareness agütsütsü ayongzüka liasü.

Tetsür chanu indang tsürabortem iba sentong nung shilem agia liasü.

V VilyChophy, DMC DHEW ajanga melepzüng o jembia iba sentong tembang.



West Bengal nung electoral rolls Special Intensive Revision (SIR) nungi entoker aliba voter tem Nadia district kubok Krishnanagar nung judicial ketdangsürtem matsüngdang parnok ken o benoktsü atema atatepba noksa nung angur.

Pak-i Kolkata amaktsü amomerenba atema Rajnath-i telangzüba agütsü

New Delhi, Rongchii/April 7 (Agencies): Defence minister Rajnath Singh-i Mongolbarnü Pakistan Defence minister-i West Bengal yimtiba Kolkata amaktsü amokmerenba atema tekümdangtsü metetdaksüogo aser küm 55 tejaklen parnok dak atalok lephsia metetdakja liasü.

Pakistan defence minister Khwaja Asif-i Honibarnü India-i "false flag operations" kar danga benoka inyaktsü merangra par linüki Kolkata amaktsü ta amokmerenogo.

Rajnath Singh-i kidanger dang ya lendong adoktsüsa inyakyim kecha benoka minyaktsü tekümdangtsü metetdaksüba sülen anogo ishika lir iba telangzüba ya

agüja liasü. West Bengal nung nüboyimba sentong ka nung shilem agiba mapang Asif-i Kolkata amaktsü amokmerenba indang asüngdangba mapang Rajnath Singh-i, Pakistan defence minister dang lendong ataloktsüsa iba amala o jembiba nungi pila alitsü ashiba den 1971 küm parnok takoksa ajuruba indang lephsia metetdaksü, koba ajanga Pakistan ya ana kuma lemdanga liasü.

1971 küm India-Pakistan rara ya linük ana tsüngda tongtibang rara ka liasü, koba ajanga Bangladesh kumtettakja liasü. "Küm tenemerpongu

tejakdang parnok kanga timtemogo aser iba mapang Pakistan ya ana kuma lemdanga liasü. Parnoki Bengal dak tenük yokra tanga Pakistan ya kwi kuma lemsatsü aji Tsüngremi dang meteta lir," ta Rajnath Singh-i ashi.

Sialkot nung osangbenertem den sensaksemba mapang Asif-i, "India-i 'false flag operation'ka benoka inyakra onoki Kolkata agitsü," ta ashiba PTI sangdong ka ajanga metetdaksü.

Toba hopta Rajnath Singh-i, Iran nung rara adoker alima ajunga makmakshishi nung aliba mapang kidanger dang ya mashikoshi inyakyim kecha benoka minyaktsü tekümdangtsü metetdaksür liasü.

Navjot Kaur Sidhu-i party tasen ka tentetogo

New Delhi, Rongchii/April 7 (Agencies): Punjab Congress-i mintokba sülen ita ana lir taoba MLA Navjot Kaur Sidhu-i Bharatiya Rashtrawadi Party ta nungja agütsür political party tasen ka tentetogo.

Kaur ya taoba mapang cricket asayar aser taoba Punjab Congress tekolakba Navjot Singh Sidhu kinungtsü lir, aser lai party tasen tentetba osang ya Hombar aonung microblogging site X ajanga metetdakja liasü.

Kaur-i, chief minister menden atema sen crore 500 nungdakba indang jembiba sülen Punjab Congress-i la suspend süja liasü.

Iba sülen lai Congress lenir Rahul Gandhi aser Punjab Congress tekolakba Amrinder Singh Raja na aiben aitsüba atema party nungi mintoka liasü.

Hombar aonung Kaur-i, mapang talangka yongya atar iba osang ya sangdonger ta ashi.

Laisa, Bharatiya Rashtrawadi Party indang banner ka tejakdang nisung ka den tangokba noksa ka lemsatepa liasü.

"Mapang talangka nungi sangdongtsü yongya ata aliba sangdong: ken o kanga junga asadanga den tang yimden yimsüsürtem inyakyim asadanger national jenjang



nung party tasen ka asoshi onoki inyaktepa aruogo," ta Kaur-i ashi.

"Linük asoshi onok taküm bendanga agütsüer aser nüburtemi kechi langa ali aser onok dang nungi kechi imlar aji agütsüner," ta lai ashi

Kaur ya 2012 küm Amritsar East nungi BJP ticket amer MLA ama shim aser lai chief parliamentary secretary (health) ama tenzükogo.

La 2017 assembly election magi tsüngda la kinungbo den külemi Congress nung aden.

Kaur-i, Punjab Congress tekolakba Warring aija aruogo. State unit raksatsüba atema lai pa aitsüba den pa ya tir ajak rongnung ochi meshitiba aser tetemsü masü ta shiogo.

Laisa, Congress lenir Rahul Gandhi aija liasü.

February 6 nü Congress general secretary, Punjab in charge Bhupesh Baghel-i, Kaur ya party nungi mintokba sangdonga liasü.

BJP, Congress, TN CM Stalin nunger tsüngda tangatettep ka alitsü: Mamata



New Delhi, Rongchii/April 7 (Agencies): BJP, Congress aser Tamil Nadu Chief Minister MK Stalin nunger tsüngda tangatettep ka alitsü südi ta shia West Bengal Chief Minister Mamata Banerjee-i Hombarnü ashiba agi, West Bengal nungi IAS aser IPS officer tem aika poll observer tem ama iba south nung aliba state yagi yokogo aser iba ajanga state nung terenlok maparen nung tetsükdaksü adoker.

Laisa, state pongu nung election aitsü liaka Election Commission-i West Bengal nungi officer 500 shi transfer yokogo, koba election agitsü aliba tanga state tem den medemdangra kanga aika lir, ta ashi.

Nadia district nung election atema nüboyimba sentong ka

nung o jembiba mapang CM-i, election agitsü sangdongba sülen West Bengal cadre nungi officer tem aika observer ama Election Commission-i Tamil Nadu-i yokogo, ta ashi.

"Na (BJP) Congress aser Stalin na den tacit tangatettep ka alitsü südi," ta lai ashi.

"Parnoki (BJP) parnok officer tem West Bengal nung tongtibang mapatem nung toktsür, ajita asünung dang parnok sadem sadema senzütettsü.

Tamil Nadu nung DMK-i aniba Secular Progressive Alliance (SPA) kong Congress, DMDK, aser VCK densema lir item party tem aser AIADMK-i anir NDA na tokteptsü. NDA nung BJP, PMK, AMMK aser tanga allies tem densema lir. Bengal nung Assembly

election akokba sülen TMC-i Delhi nung BJP dak rangloker inyaktsü ta shia Banerjee-i, "opposition tem longjemdaksütsü atema ni linük ajunga asemtsü," ta lai ashi. Laisa, parnok nungdak dang süra party ajak anir senzütsü, ta shisem.

TMC tekolakba yagi ashiba agi, 2024 küm BJP-i takok anguba voter list ya West Bengal nung Assembly elections agitsü ita asem lia sentoka toktsüogo. "Na (Ato kilonser Modi) mapa nungi anentsüla, home minister aser sorkar ajunga resign asütsüla," ta Banerjee-i ashi.

"Nenoki nenok sasa mapa nungi manenra nüburtemi anendaksütsü ta temulungdang yuang," ta lai ashi.

Banerjee-isa, Bengal nung BJP-i sorkar kumtetra parnok angu, shi aser entsü machitsü atema tenokdangba agütsütsü ta ashi. "SIR exercise benokba ajanga Bengal nung nisung 250 süogo aser nenoki (BJP) iba khuret ya abentsüla. Ni Election Commission nem tai metongloktsür, kechiyong parnoka CBI aser ED ama oro dang lir," ta lai ashi.

Assam nung Congress-i sorkar kumtettsü: Kharge



New Delhi, Rongchii/April 7 (Agencies): Congress tekolakba Mallikarjun Kharge-i Mongolbarnü Assam nung voter tem dang state nung Bharatiya Janata Party (BJP)-i aniba sorkar ya raktoktsü mepeshiba den, iba sorkar ya linük nung ajak dang ochi meshitiba sorkar lir ta ashi. Paisa, chief minister Himanta Biswa Sarma-i nüburtem atema masü saka pa ajangzüksü atema dang inyaker ta ashi.

Paisa, state nung nüburtem tebilemba melenshidar, koba parnok den sensaksemba mapang jangjar ta ashi. Item ajak ya asadanger Congress-i menden 126 nungi 72-72 bo akoktsü ta asatetogo, ta ashi.

"Assam nung ochi meshitiba sorkar atsüngtoktsü atema nenok ket nung maongka lir. Linük nung Sarma ama tanga chief minister mali, shiba kanga ochi mashi aser pa atema dang bilemba nisung ka lir," ta pai Guwahati nung nüboyimba sentong tatemnübuba

osangbenertem den sensaksemba mapang ashi.

Paisa, Assam nungertemi pei sobaliba aser yimayimpongtem kanga akümstübur aser iba amala pei atema dang bilemba aser tangar hau ta maliba chief minister ka maginer, ta ashi. "Nüburtem atema inyaktsü melena pai company, süngolu compant, resort balala alizüka pa ajangzüksü atema dang inyaker," ta Kharge-i ashi.

Pai, Sarma aser pa kinungtsü anema ken o benokba ya state nung BJP sorkar aser Centre-i bushisüngdangtsüla ta ashi. "Ajisüaka iba melena parnoki tashishiba-ang benoker," ta pai Sarma kinungtsü ket nung passport asem aliba aser Dubai nung par kinunger ki-o-jen aser US nung company ka aliba indang aitsüba tetshia jembia liasü.

Kharge-isa, Assam nunger ali company tulutem nem commission agir agütsüba atema BJP sorkar aija liasü.

Congress tenangzükba indang jembiba mapang Kharge-i, Congress-i sorkar kumtetra anogo 100 tsüngda kentener Zubeen Garg ken o bentettsütsü, tetsürtem nem itashia sen agütsütsü aser shishilemba balala tenzüktsü atema tetsürtem nem khen atema sen 50,000 agütsütsü ta ashi.



TIR YIMYIM YIMOBILEM (EDITORIAL)

DIMAPUR WEDNESDAY, APRIL (RONGCHII) 08, 2026

Govt dak talibo meimplatsüla

A tangji, government ya nübortem asoshi nüngdak inyaktsütsü atema nübortemi kümtetba yimten lir, anungji nübortem temzüng ozüng ka kübok azüoka ayutsü aser nübortemi meinyaktetsüba mapa tulu electricity, gari lenmang, mozü ki aser kaketreju ama nüngdaktemji government-i inyaktsütsü aser nübortem lendong timtem nungi kümzüka ayutsü asoshi government-isa mitkartem anepalutsü. Item mapatem dakji alaka tanüngba nübortem nüngdakba mapatembo nübortemi inyaktetsü. Ajisüaka, asenoki government dak tali imlar, ibayongji aenokia meinyaker aser government-ia meinyaktsür ta tetsüngda nung asenok kanga akoksar. Aji oda, asen lima nung election mapang tasüa majem tashiyim mapa inyaktepba yaa asenoki asen nüngdak ajak government-i inyaktsütsü amai bilemba ajanga atalokbatema lir, kechiyong election nung asenoki yariba nisung adoka MLA kümra, junga züngashia maliyonga aser tatidang magütsüyonga ayongayonga government mapa kabo angutsü amai aseni bilemer. Kasaji, peii yariba nisung MLA kümra mapa meinyak ser sen angutsü aser ayongayonga alitsü amai bilemer. Aji oda, asenoki aseni adokdaksüba MLA ji asen taküm aser kibong mesüsang kümtetdakba ka amai asenoki bilemer. Ibayongji, election mapang tasüa majem taküm ajak bendanga agüja aseni temlung lemtetba candidate yarir aser election temer asen nüngdak ajak MLA dang meshir. Ajisüaka, itemji mataloker, kechiyong MLA kati pei nübortem nüngdak ajakbo magütsütetsü. Atangji, MLA kolok aser shisatsü nung lira, pai nübortem nem mapa inyaktsüba aser rongsen angutsüba lenmangbo sayutetsü. Aji oda, MLA dakji temetetba, tajangshiba aser tangatetba shisatsü lira, pai mesüra lai ango magütsütetsüa akok saka ango aputsüba tasa aser lenmangbo sayutetsü. Tanü nübortem asoshia angoji masü saka ango aputsüba tasa aser lenmangjiang metetsü nüngdaker. Aji oda, tagütsürüa ango masü saka ango aputsüba tasa agütsütsüla aser temeshir nübortemia ango masü saka ano aputsüba lenmangjiang sayudaktsütsüla. Ashiko, nübortem shisa makaba agi election mapang ango dang meshia alitsüa akok, iba jagi angoji khen so chirbo election temer temeshidaka maka aser peisasa ango aputsüa makoker ta timtem tia nung peisasa meshimetsür kümmer alir nisung aika lir. Ibaji asenoki government dak tali imlaba agi lir. Asenoki chi mechiyong melitetsü, ajisüaka asenoki chiyongtsüa government dak nungi dang imlar, anungji asenoki alu mayimer, asenoki züsentetba kecha maka, kecha meinyak ser asenok nüngdak ajak government nungi angutsü imlar. Ajisüaka, nübortemibo government nüngdakbatembo ajak agütsütetsü saka kodaser government-i nübortem nüngdak ajak agütsütetsü ? Aji oda, government teyari tilakata mengura asenoki asen chiyongtsü asoshia alua tilakata meyimli ta bilemba shisatsü aser tangatetba agi asenok mapang talangka kangshia arudagi, anungji iba mashi angatetba shisatsü ya endoktsüla aser asenoki asenoksasa aseni inyaktsüba shilem aser government-i asenok asoshi inyaktsütsüba shilemji angatetsüla. Ibaji kodang asenoki angatetdir, asenoki government dak nungi meimplatsülabo imlaa melii asenoksasa inyaktsü, idangji dang asenok senpong aser jangpong dang masü saka temanga junga alitsü. Aji oda, kodang asenoki government dang nungi imlaa melii asensasa asen nüngdak nguteta inyaktsü tenzükdir, idangjiang nübortem kibur aser government-ji kilir ta akümstü. Idangjibo, nübortemi government nung alirtem bushitsü masü saka government nung alirtemiang nübortem bushitsü. Iba ama tensa mapangji ka asenoki tanü yanglutetsüla. Aji tasak masü. Aji tazüng tashir lanurtemi anir tangar takar aser temeteter ayongsemer asen lima nung alu ayim tenzüka nungi tenzüksü. Tanü asen lanurtem shia ya iba temelenshiji asen limai bener arur "development agent" kaka asütsü merangtsüla. Iba jagi dang asen lima tajungba küma melenshitsu.

OLEMSABANG

TEMBAR ANA OTSÜ

~ K. Moatoshi

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Aremzüksang jabaso ana, ka Doctor aser ka Engineer aküm, jala ana ka minister aser ka Army officer keyi ao. Sensak sang po jeko alima khuret ajak pongtokogo, tanürtem ajak tajung kümmer kinungtsü tena joko tanürtemi meyiper yaritsü mapang, anisungzüka tim tim ajak ama-a alitsü Tsüngremi mapang tajung bener arutsü. Tanürtem züngdaksü dang sentsü aliba ajak tanürtem aotsür, yimtak kinungtsü tena nem tanürtemi semchr anir yimdaki benjong amongi arudang anentsü lungru ki tajung sua doktsü. Ita shia tanürtemi sen bener yokba magima yimtak sensaker aser Tsüngrem tenzükertem den sa lemsatöp. Ano tanürtemi Aremzüksang aser kinungtsü nungtem nung school züngner saka teyarir malirtem nem teyari agüja school züngdaksü. Kinungtsü tena yashi-ang anitepba ali ama jangratema nupurtem yaria pelatepba ali.

Kodang Konangbai pa tembar kibong anisungzüka angu pa temulungjang nung animesungzüktetba tanela ka agi pa semdang. Anogo shia iba tenuk meremba tanela jaki pa ayip mejangdaksü, iba tanela jaki pa anu adok apen jashia dang alir pa mepelateter temang nunga tashidaka atentetta chia-a mechiyongtetti anogotem sui daksü. Iba ama mepelatetti aliba tensa tia ka nung alidang par jabaso tamposang mozü tali achiba agi asüba osang angashi. Iba osang angashili jala tanütsüla teti asüba ngur temelongjang pokma asü. Jala tanütsüla o jabaso na asüba osang angashia kinungtsü süchia ao. Iba ama tamangu lendong mapang nung Konangba tawadakdak maka temelung kong ang mayu shisa ajak rama kanga korem. Joko taküm tajung alidang bendenba rongsen ajak to juli tapok nung asem ama, tanürtem dak rongsen indokba ajak amajok aküm. Tanürtem dak rongsen ajak lalumar alidang kibong nung lendong madak lending inungtsü strok sur mozü ki-i bener aotsü sen maka kidang yipden nung dang anep alu. Konangba nuktsü agi ananger shisabulu tia nung alidang kisemer to-a Shinga mali kishi kolak ayudanger shinga mali anogo shia tsüngdang pi ajak kongga azüng meyaker. Alishi nunga küm nunga tain akümer aser tanürtem dang yimlaba mangdang ajak koya-i sur aodok. Jabaso talakba tzüma limai tazüngi yokba tanger-l meim mozü chidaktsür tekolok raksar kidangi anir aru, aser tetsür rongnong tantsüla tsürapuri kenu danga sayupentsü mesudangji asang chir ka anir kidang shilang. Konangba yimer ajak dang alia joktetta ain sangto yimer yimsanger dang koda ang tejak sayutsü ta aakseta temang-a meyip majung temelong korem jashia aliba tensa ka nung alidang, talen ajak azüa yimti yimdang ajak ramoka ayala takar jala pa kinungtsü meshilang limai/ tipu limai oadok. Konangba kechiang mesayangi aküm, shisa ajak ramar talakba tekolok raksar o-a mejembir, jalai asang chir dang ka anir aru, kidang parnok pezü chiyongtsü-a kecha maka, kidang-a tsünglu asener, anogo-a tan sa talangba amai, amang a kodanga mesangwatsü ama bilema Konangbai tesüiba anogotem bilemtetdang, pai inyaksaba mapatem bilema kanga sasa saka lepa marutet. Pai pa lanuwa tembar tajungsang pa sungpo apusang-a pai sentok, item tesuiba mapatem bilemteta pa kanga sasa. Kechiaser par temparbo tanür ajak tajung kümmer kinungtsü tena jangratema aliba ngur nukshia bilemer saka aseni akümüli nung kechi proktir agi dang meyipa aseni arutsüji Konangbai yimer nemnemba ola to mangashi saka Tsüngremibo angashi, anungji nisungi mazüktsütetba tsüngtsüng to tanü Tsüngremi konangba nem azüktsü. Pa nem moatsüba rongsen agi tenung masüng, mokokmeiner, matamapensar aser tantsür tampurtem indang sen meimzüka agitsüba aser taküm tajung sempet rongsen ajak Tsüngrem nungi angu sur nung pai peisasa angu ama asüküma bilemba.

(Maneni asüng adok nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Union Minister Rijju-i Khristanpur yaritsü nangzük



Thiruvananthapuram, Rongchii/April 07 (Agencies): Teyari mapa atema bendangeri teyari agütsüba azioktsü asoshi ozüing ka yanglutsü aliba nung Khristanpuri tebilemtsü lemsatepba reprangtsü Union Minister, Parliamentary Affairs & Minority Affairs, Kiren Rijju-i nangzük.

Rijju-i April 3, 2026 nü Kerala state yimtiba, Thiruvananthapuram nung Catholics nung densema denominations balala nungi Khristan lenirtem ajurua liasü.

"Ni Khristanpur dang parnok shisabolu masütsü shiogo," ta pai ashi.

Foreign Contribution (Regulation) Amendment Bill, 2026 ya soita lir aser Kerala nung April 9 nü state assembly polls agiba sülen jembitsü.

Bendang lima nungi donations aruba aser teyari mapa nung amshiba tem tashi itshitsü nükjidong nung iba amendment bill ya Ato Kilonser

Narendra Modi indang cabinet-ibo melaogo.

Lokti tentet indang Foreign Contribution (Regulation) Act (FCRA) registration soitba, athiba, bendanga agütsüba mesüra renew masüba sülen bendangeri agütsüba amshia ki o jen yangluba sorkari azüoktsü asoshi iba ozüing nung statutory mechanism ka lir.

Yangji Section 14B tasen ka inoksemer, koba ajanga lokti tentet indang registration mapang liwaba mesüra renew asütsü memulungba sülen FCRA registration tembangtsütsü shia lir.

Iba ozüing nungya ochishia inyakba tashi itshitsü atema bendangeri teyari agütsüba amshitsü atema mapang tejangja agütsür.

Catholic Church densema Khristanpur lokti tentet balalai iba bill anemer aser iba yagi bendang lima nungi teyari anguba tejangja civil society organizations aser non-governmental organizations

(NGOs) dak kongshitsü ta ashir.

Union Minister Rijju-i linük ajangzüksü asoshi inyakba NGOs aser civil society telok tejangja ajunga sorkari kumzüka ayutsü ta ashi.

FCRA ya yanglushiba sülen India tejangraba anema inyakba 'illegal organizations' aser inyakyim tai atema item senotsü amshirtem dak kisüing tenük yoktsü, ta pai ashi.

Lokti tentet tajung, aser talisa Khristan lokti tem shisabolu malitsüla, ta Rijju-i ashi.

Minister-i tejangja lokti tentet dak sorkari mokongshitsü ta nenshia ashi.

"Ano maneni ni Kerala nübur aser talisa Khristan lokti tentet tem dang ni ya shiner, shisatebolu, FCRA bill yagi India indang security aser India indang tejangraba anema inyakba radical organizations dak kisüing tenük yoktsü."

Rijju ajuruba Khristan lenirtem rongnung dena alisang Father Eugene Pereira, Vicar General of the Latin Archdiocese of Trivandrum-i ashiba agi, asen lokti tentet temi linük yangerba nung tongti shilem agir ta angateta lir.

"Pai telangzüba tajung agütsü, aser onok tebilemtsü ato kilonser den lemsateptsü ta onok dang ashi," ta putiri UCA News dang April 7, 2026 nü ashi.

Iba bill ya Lok Sabha nung April 1 nü jembitsü liasü, saka Khristanpur aser opposition MP kari anema nokdakba sülen thina liasü.

Indonesia nung Good Friday mapang prayer house ka shibangtsü

Jakarta, Rongchii/April 07 (Agencies): Indonesia nung Banten Province ketdangsür temi Protestant arogo ka meyong sarasademba ki ka Good Friday sentong agiba sülen shibangtsü.

"Nisung 200 shi onok sarasademba ki telungi aita signboard shisatsütsü amokmerenba sülen iba mera ya agi," ta Thessalonika Ecumenical Christian Fellowship (POUK) atema odongtar Reverend Michael Siahaan-i April 6 nü ashi.

Jakarta nungi anüolen mile 16 shi pilar Tukang Kajang, Kampung Melayu Timur village nung Tangerang Regency Public Order Agency ajanga shibangja aliba sarasademba ki nung, iba ki ya tekülem agütsü atema temelaba mali, ta zülur yuja lir.

Agency tekolakba Ana Supriyatna-i ashiba agi, public order nung timtem agütsütsü ama aliba yong jelia mera agia ki ya shibangtsü.

Khen asoshi Easter Sunday tekülem sentong agütsü asoshi parnok nem taoba sub-district office nung hall ka agütsü.

Iba timtem yagi tamangertem kanga aoksatep ta Reverend Siahaan-i ashi.

"April 3 nü tetsür aser tanur timba sür tamangertem sarasadema ken tenzükli nisung telok ka ya aru," ta pai ashi.

POUK Foundation indang chairman Oktavianto Pardede-i sarasademba tesem ama amshiba ki shibangtsü atema jelia osang magütsüba asoshi sasaba lemsatepa liasü.

"Iba tesem ya mosque nungi meta talang agi pilar, aser iba hall ya soundproof lir, anungji kiyonger nem timtem agütsüba mali," ta pai ashi.

POUK Foundation yagi July 2023 nung building permit meshia application agütsü saka yangji aliba ketdangsür temi kodanga telangzüba magütsü, ta pai ashi.

Tesüiba küm asem tashi yangji aliba tamangertem hardline groups temi timtem agüja aru, ta Pardede-i ashi.

Easter Sunday nung tamangertem ajurusang Tangerang Regent Maesyah Rasyid-i sorkari nüburtem tekülem aliba menokdang saka permits meshitsü

tongtipang lir ta ashi.

Kin tilatem tekülem ki yanglutsü atema aiben permit ozüing agi timtem agütsür aser ibaji local Muslim nung temi hadir ka ama amshir.

Minister of Religious Affairs aser Minister of Home Affairs indang 2006 Joint Decree nung tekülem ki ka meyangludang tekülem sentongtem nung nisung tajemba agi 90 adentsü nungdaker ta shia lir.

Danga tamangba yimsü sülen anidaker nisung 60 indang meyongnem den local Religious Harmony Forum nungi recommendation nungdaker.

Tang tesüsa atalokba yagi Khristanpur temulung yirutsür aser linük indang constitution nung tamangba yimsü temeden agüja aliba nung tetsükdaktsü agütsür, ta Communion of Churches in Indonesia ajanga ashir.

Taoba küm tamangba yimsü temeden nung aibelenba 221 aser nisung 239 timtem ajurua liasü, ta advocacy group Setara Institute ajanga ashir.

Indonesia nütsüing yongsük million 285 dak tema aliba nungi Khristanpur million 29 shi lir.

ANO GO ABEN TSÜNGREM DEN

Ozü kibongibo

Ni aser ozü kibongibo Kihuba tenzüksü.

(Yihu.24:15)

Yihusuar kibong nung süngyanglu tsüngremtem benloktsü atidangba aika dang liasü, aser itemji benloktsü koka dang liasü, saka pai Kihuba Tsüngrem par kibong nung anioktsü aser tenzüksü ang shimtet.

Pa army general ka, yimsüsür ka liasü. Nüburtemi pa telemtetba angashir nubur ajaki Yihusuai tenzüksü Tsüngrem sa tenzüksü nangzük. Kin aser kibong nung Tsüngrem meteta alitsüba yimsüsür aser kibong nung tekolak telemtetba dak keta lir. Yimsüsürtemi Yihusuai ayimoktsüba ama "Ni aser ozu kibongibo Kibubasa tenzüksü; nenoka shiba tenzüksü shimtetang" ta ashiba ama tanu yimsüsür shibai aser shir kibongi shitetsü?

Nai ne mulungjang ajunga agi Kihuba meima Pa tenzüksü shimtetra ne nubur aser ner kibongi ne tsüngnep nung anidaktsü. Yimsüsür aser kibong nung tekolakji kin aser kibong asoshi tatishitsü aketba taküm ka asütsüla. Yihusuai ama tarendak makai Kihuba tenzüksü shimtetra Kibubai ne kin aser kibong moatsütsü!

Pakistan Easter procession nung truck agi atsük

Mariamabad, Rongchii/April 07 (Agencies): Pakistan nung aliba Punjab province kübok Wazirabad district nung Mariamabad tesem nung April 5 anepdang Easter procession mapang truck kati arua atsükba lendong nung nisung ka asü aser aika yiru ta ashir.

Yisu Khrista tasü madak takok ngur shia aruba temaitsü anepbongi Easter sunrise service agütsü Khristanpur 200 shi adenshia lia iba lendong ya anepdang 3:30 ako meta atalok.

Light commercial vehicle - koba dang Shehzore ta ajar aser oset belenba nung amshiba truck ka lir - ya Mariamabad anasa kanga keria arua tekülemer dak atsükba mapang nisung 60 dak tema yirutsü aser karbo kanga sashia yiru. Iba mapang tamangertem tetsübo nung jenshia aodang ano nisung talila yirua liasü.

Gari anisang ya Muhammad Bilal ta jangjaogo aser pa iba tesem nungi jena ao ta police-i ashi. Gari aser driver den yaritepsang police ket nung lira ser First Information Report ka benoka bushisüngdang tenzüksü.

Iba sentong nung shilem agir Faisal Masih-ibo ketdangsür temi menur telangzüba agütsü ta aitsü. "Police station ya minute 10-15 shi pilar lir, ajisüaka parnok ghonda ka shi lir ang aru. Yirur alir dak rangloktsü melen palrnoki lenmang nokdanga aliba indang ang bilem. FIR nunga onok ya sunrise procession agia liasü ta shia mali," ta Faisal Masih-i ashi.

Yirur alirtem ya Gujranwala Medical College Hospital bushia bener ao aser yangji

mapang tatsüka lir nisung ka asü aser aika tang tashi mozüki nung lir.

Catholic Commission for Justice and Peace indang deputy director Ata-ur-Rehman Saman-i iba tatalokba yagi temulung raksar ta ashi.

"Rongrongshirong aser tetsübo agi kibong aika aoksatsüogo. Ketdangsür temi nüburtem kumzüka ayutsü mera agidang iba tatalokba ya zübazüyima metoktsütsüla aser yangji ochi alitsüla," ta pai ashi.

Ketdangsür temi iba tatalokba ya asaa asü mesüra senzüka yutsüba ajanga atalokar ano mejangjateti lir.

Police temi ashiba agi, parnok dang iba procession atema jelia osang magütsü aser iba yongji security anepalu masü. Ajisüaka Khristanpuri iba sentong atema ketdangsür nem jelia osang agütsür liasü ta ashir.

Chosen Generation ta sür Khristan lanur fellowship ka nung züngsem Waqas Saroya-i iba lendong yagi tamangba yimsü indang sentong tulu alidang nüburtem kumzüka ayutsü asoshi tebilemtsü tuluba akumer, ta ashi.

"Yisu shia aruba benjongtsü asoshi adenshia alirtem tang mang ayimtsüsa atalokba ya kanga tia maka. Police aser nüburtemi ashiba meputeper saka nisung kari senzüka yutsüba yong nüburtem yiruba tejangja lir."

Iba tatalokba yagi Khristanpur-i tamangba yimsü dak sendakba sentong tulu, talisa Easter ama tongtipang anogo nung ketdangsür den amalitep tebilemtsü tali tuluba kumdaktsür, ta pai ashi.

AO OSHI ANGAZÜKDAK:

TANÜ ANGAZÜKTSÜBA OJANG



Warok

(n) au tulu aser talang tapu ka (a large bamboo species)

* Yimtak among nung warok rong tulu asem lir.

Waroki

(n) alu jendang chi ayuba takdang tilaka, yangji waro nungi kümzüksü atema chiyongtsü ayur (a small room in a farm house to keep food protected from crows.)

* Alu jendang waroki nung chiyongtsü ayuba waroi chitsür liasü.

OLONG PAITEP # 7467

1	2	3	4	5			
		6					7
	8						
9			10	11			
		12					13
				14			
16					17		

TIPLIN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S_ _ _ i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüingdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga tulu - (5)

OLONG PAITEP # 7466 TELANGZÜBA

TIPLIN :

- 1. Semtu, 3. Lepko, 5. Bilem, 8. Ulu,
- 10. Tsünpang, 11. Tesangwa,
- 13. Aoksa, 15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
- 6. Lungkak, 7. Milak, 9. Zünga,
- 10. Temopu, 12. Walu, 14. Ali.

NAI-A YA METETTER



March 6, 2026 nü arishi küm 90 tain Ann Crile Esselstyn (USA) ajanga Guinness World Record tasen ka yangluogo.

Arishi küm 90 aser anogo 231 tain Ann-i minute 2 ser second tashi 'dead hang' süteta liasü aser iba ajanga "oldest person to hold the dead hang position (female) in the world" otsü yanglutet.

Meghalaya nung North East Regatta 2026 tembangogo



Shillong, April 7, 2026

(Agencies): Meghalaya nung 4 buba North East Regatta 2026 takok ngua tembangogo aser iba tetoktepba nung 100 sailors tema shilem agia liasü.

Umiam nung aliba Water Sports Complex nung iba benjung amung aser iba ajanga India sailing calendar nung Meghalaya jenjang akangshiogo.

Iba tetoktepba ya Yachting Association of India-i Umiam Sailing Club den yaritepa ayongzük aser state Tourism department-ia teyari agütsü.

Iba tetoktepba nung ILCA 4,

Optimist, 420 Mixed, 29er aser Techno 293 category balala liasü.

North East Regatta 2026 atema Rs 10 lakh dak tali prize pool liasü aser ibaji telemsa balala nung takoker nem lema agütsüogo.

"Ni sailing events aika ayonga agiba nguogo saka India nung sailing event iba ama ya tulu magidang" ta Yachting Association of India nung Vice President, Lt Gen TSA Narayanan-i ashi.

Rudresh Singh Patel and Mayank Rajput secured the top position in the 29er boys' event.

National Sailing School nungi

sailors-i shilem tajung agia liasü aser Ankit Singh Sisodiya-i ILCA 4 boys aser Tulsi Patle-i girls' category nung temaba takoktem angu.

International nungi Kedah Sailing Association aser Malaysia Sailing Association ajanga tongti shilemtem agia liasü aser Malaysian mixed youth team-i 420 class takok angu.

Maneni, Kedah sailors-i Optimist main fleet takok angu aser Muhammad Zulfan Akif o Nur Iman Sofia na nem Optimist green fleet atema special gold agütsü.

AAPSU elections nung Meje Taku-i president takok angu

Itanagar, April 7, 2026

(Agencies): Arunachal Pradesh nung kaketshir telok tongtiba All Arunachal Pradesh Students' Union (AAPSU) ketdangpur tasentem shimogo.

27 buba general election nung Meje Taku-i AAPSU President inyaksü takok nguogo. Taküm elections nung ashishitep, mepetmesü aser

ozüng alema inyaksangshiba tatalokba aika ajangshia aruogo.

Counting 25 rounds ta asüba sülen Taku-i 5,604 votes nungi 2,513 votes aser Debia Muj-i 1,552 votes anguba osang metetdaksü. President menden atemasa Byabang Hapo Dui-i 1,480 votes ngua liasü.

General secretary atema Mato Bui-i 2,644 votes ngua Nun

Pertin, Tali Gongo, aser Thomas Jerang madak takok angu.

Vice-president (west) atema Lukken Kukken Gamlin-i 2,323 votes ngua Bengia Anthony aser Gachi Techu madak takok angu.

Maneni, Reri Tajo Rai-i co-convenor (women) aser Zentle Mosu-i finance secretary mendentem nguogo.

Tripura nung HIV detection atema mobile bike units tenzük



Agartala, April 7, 2026

(Agencies): Tripura State AIDS Control Society (TSACS)-i mobile bike units tenzükogo aser iba ya state nung district 8 prong nung HIV detection aser outreach tajungba akümtsü atema lir.

Iba mapa ya Health and Family Welfare Department lenisüba kübok tenzük aser "hard-to-reach

areas" nung senzüsü atema bike 8 mapa lenzüksüogo.

TSACS Project Director Dr Binita Chakma-i sentong ka nung eight partner NGOs nungi trained personnel nem bikes agütsü.

Parnoki field-level HIV screening, awareness drives aser referrals maparen inyaksü.

"State ajungalen HIV detection maparen tajungba inyaka arudar. Screening services ulushitsü atema mapang talangka temulung agüja arur aser district shia dangi mobile bikes 8 yokba ajanga tesem ajungalen services agütsüsü, iba ajanga public tajangzük angütsü" ta Chakma-i ashi.

Vietnam lenir To Lam-i tir election kokogo



Hanoi, Rongchii/April 7 (Agencies): Vietnam nung ozüing yanglurtemi Mongolbarnü tir election nung Communist Party Secretary General To Lam shimogo, aser iba ajanga pa ya küm aika tsüingda Vietnam nunger lenirtem rongnung ajak dang tashi taittiba kümdaktsüogo. China ama Vietnam nunga lenisüba yimya melentsü akok ta bilema aliba ama tang iba ya atalokogo. Parliament website ajanga ashiba agi, Mongolbarnü National Assembly session nung dena aliba deputy 495 pronglai Communist Party-i nominate asüsang pusema vote agütsü. Ketdangsürtemisa linük tir mapa atema nomination ya

March ita tatemlen party senden ka nung telemtetba agia liasü, ta ashi. Taoba mapang public security tekolakba ya tang taruba küm pongu linük yimsüsü asütsü atema shimogo. Lam ya January ita term tanabuba atema party general secretary asütsü shimer liasü. Election agiba sülen Lam-i, mapa anaprongla atema pa shimba atema pelaba lemsatepba den science, technology, innovation, aser digital transformation dak rangloker terenlok model tasen ka benoktsü tenangzükba agüja liasü. Paisa, defence dak sendakba nung tangar dak memetaloktsü asoshi tongtibangsa inyaktü ta ashi.

Ano pai, linük tamendakdak yanglushitsü, linük takaratiba nung mapang talangka asoshi renloka odaktsütsü aser nüburtem taküm libaliro jenjang ajungkettsütsüji pa asoshi tinyaktsü tongtibangtiba asütsü, ta ashi.

Kasa mapang nung ken o asadangertemi, Lam-i linük nung tongtibangtiba mapa anaprongla abenba ajanga pa nükjidong ataloktsü asoshi tezübaba kümdaktsütsü ta ashiba den, tashi tali agütsüba ajanga pa sünütsü süa timtem lendongi aitsüa ana nung lir ta shisem.

2024 küm party General Secretary Nguyen Phu Trong asüba sülen Lam-i mapa anaprongla ya mapang tatsüka atema bener liasü.

Ajisüaka tir mapa ya army general Luong Cuong nem agütsüba sülena Lam-i pa tir ama inyaksangshia linük tenüing nung tesem balalai oa bendanger lenirtem den senden balala mena aruogo.

Pa party tekolak akümba sülen arishi küm 68 tain Lam-i, rongsenketzüing nung temelenshi aika bener aru, koba aikati pelashishia agizükogo, saka aikati aija liasü.



Hanoi, April 7 : Vietnam yimtiba Hanoi nung April 7, 2026 nü tenangzükba agiba sentong nung Le Minh Hung adenba noksa nung angur. Vietnam indang 16 buba National Assembly ajanga Mongulbar nikongdang Le Minh Hung ya kümsük 2026-2031 atema linük ato kilonser tasenba ama shima liasü.

Istanbul nung Israeli consulate anasa nisung asem tepset

Istanbul, Rongchii/April 7 (Agencies): Turkey kübok Istanbul yimti nung Israel indang consulate amenoka aliba ki anasa khatepba sülen nisung asem tepset aser police officer ana yiruogo, ta Turkey media sangdong balala ajanga metetdaktsü.

Mongolbarnü khatepba nung nisung asem densema liasü, saka parnok ya Turkey police-i tepsetogo, ta Al Jazeera osangbener Sinem Koseoglu-i ashi.

Reuters news agency indang video ka ajanga khatep tialong nung police officer kati pa indang prangbong atsüteter atsükokba nguogo. Video nungsa nisung ka azü agi melangbanger aliba nguogo.

Consulate amenoka aliba tesem ya nisung aika aliba tesem ka lir, kong international business tem densema business aika amenoka lir aser iba temeket nung nisung meyirejang aika mapa inyaker, ta Koseoglu-i ashi.

Israel indang consulate ya iba tesem nung aiben atongtepa tua sür aliba ki ka indang floor tenetbuba nung lir, ta lai ashi. Iba ki ya Istanbul nung Besiktas

district kübok Buyukdere Street nung Yapi Kredi Plaza nung amenoka lir.

"Ni sensak asemba tenük kuli agütsür kati ashiba agi, pa külem mapa inyaker ka den moko chia aliba mapang nisung asem gari nung aru aser injang akha tenzük aser security-i meyiper parnok dak injang khaloktsü," ta Koseoglu-i ashi.

Istanbul nung Israeli diplomat ka danga mali aser Turkey yimtiba Ankara nunga Israeli embassy nung Israel nunger diplomat ka danga mali, anungji diplomatic missions telung nung alirtem ya local tem dang lir shirnok consulate mesüra embassy atema inyaker ta ashi.

Turkish Interior Minister Mustafa Ciftci-i ashiba agi, iba tesem amakertem jangaogo.

Paisa, parnok ya Izmit yimti nungi taah agütsür amshiba gari ka nung aru. Parnok rongnung ka tamangba yimsü anemba telok ka den sendaka liasü aser ka taoba mapang temesepba mozü dak sendakba nung aitsür lir, ta ashi.

Justice Minister Akin Gurlek-i ashiba agi, iba tatalokba dak sendakba nung bushisüingdang tenzükogo.

Phom Union Mokokchung AJANGA SANGDONGER

Mokokchung Town kübok Phom nunger tangar kidang yaritepertem mesüra kidang lia School/College azüngerterem/ training agirtem/mapa balala inyakerterem kwika lir, parnok ajak union nung tenüing zülüoktsü atema 11th April 2026 (Saturday), 10:00 Am nung Union Treasurer (Above Marvel Guest House, Alongmen Ward) ki bushia arutsü Metetdaktsür. Teküboklen agüja aliba item nungdakattem (detail) bener arutsü mepishir; Tenüing (Name), Arishi küm (Age), Tebu tenüing/Yim (F/Name & Village), Ki Kibur tenüing, Yim/Address & contact No, Tanur noksa ana (2 photo), Registration Fees Rs. 200/-. Tenüing mezülüoki tarutsü nung timtem/lendong ajurura, union-i khuret mabentsü. Iba sangdong dak alaka kibong shia dangi osang balala meyoktsü. Anungji ajaki ibai tongtibang ta angateta tenüing zülüoktsü asoshi metetdaktsür.

Sd/-
L. Nyamei Phom
President/8974805169

Sd/-
B. Chingba Phom
G.Secretary/841395254

ALI / KI AYOKER

Jamabandi Patta aliba Ali aser Ki ayoker.
At Anitet Colony, Lengrijan, Dimapur, Nagaland.
Ali Tasazuk : 9,500 Sq.Ft (Aprox)
Jenang : Rs.900/- per Sq.ft (Negotiable)
Contact No : 9856546175.

ALI AYOKER

Signal Angami, Lane 9. (Tir Yimyim Press anasa) Dimapur.
Area 122 x 80 ft.
Jenang jembiteper dalang agi ayoktsü.
Kibur den dang Ao agi yangi jembangma :
Mobile number - 9436006195.



ALL INDIA INSTITUTE OF MEDICAL SCIENCES EXAMINATION SECTION



ADMISSION NOTICE NO. 41/2026

F.No. AIIMS/7-10/Exam.Sec/(B.Sc-M.Sc-2026)/2026 24.03.2026

Admission Notice for B.Sc. (Hons.) Nursing/B.Sc. Nursing (Post-Basic)/B.Sc. Allied & Health care courses and M.Sc. Nursing/ M.Sc. courses/M. Biotechnology for session August-2026 at AIIMS New Delhi & other AIIMS

All India Institute of Medical Sciences, New Delhi ajanga tekalen shia aliba subject nung courses agitsü asoshi tsünglanglen shia aliba mapang Entrance Examination atema Online applications meshir.

SCHEDULE FOR UNDER-GRADUATE COURSES

Commencement of Online Registration for submission of application for B.Sc. (Hons.) Nursing/B.Sc. Nursing (Post-Basic)/B.Sc. Allied & Health Care Courses August -2026 session	Start Date :25.03.2026 Closing Date: 24.04.2026 (05.00 PM)
Date of B.Sc. (Hons.) Nursing Examination	27 th June, 2026 (Saturday)
Date of B.Sc. Allied & Health Care Courses Examination	04 th July, 2026 (Saturday)
Date of B.Sc. Nursing (Post-Basic) Examination	30 th May, 2026 (Saturday)

SCHEDULE FOR POST-GRADUATE COURSES

Commencement of Online Registration for submission of application for M.Sc. Nursing/ M.Sc. courses/M. Biotechnology August-2026 session	Start Date :25.03.2026 Closing Date: 24.04.2026 (05.00 PM)
Date of M.Sc. Nursing Examination	20 th June, 2026 (Saturday)
Date of M.Sc. Courses/M. Biotechnology Examination	13 th June, 2026 (Saturday)

Applicants temi mapang shia website www.aiimsexams.ac.in semdangtsüla, kechiaser iba sülen melenshiba/ metongshiba/updates ajunga website nung kisüing inoktsütsü.



GOVERNMENT OF NAGALAND DIRECTORATE OF TECHNICAL EDUCATION

Nagaland : Kohima - 797 004



NO.DTE/SCTE/6/2023-24/ Dated, Kohima the 6th April, 2026

NOTIFICATION

NO.DTE/SCTE/6/2023-24:In continuationto this office Notification of even No.dated 2nd March,2026 prescribe Application Form submission to undergo 3 (three) years Diploma Courses in Government run Polytechnics for the academic session 2026-27 is extended till HSLC/HSSLC 2026 result is declared.

(ER. VIPULHOU LHOUNGU)
Director

2buba Showuba Memorial Volleyball tournament tenzükogo



Dimapur, Rongchii/April 7 (TYO): Shamator District Volleyball Association (SDVA)-i ayongzükba 2buba Showuba Memorial Volleyball tournament April 7 nü Public Ground, Shamator nung tenzükogo. Iba asayamung ya April 9 nü tashi asayatsü.

Mongolbarnü asayamung lapokba sentong nung Advisor Youth Resources & Sports S. Keoshu Yimchunger alakteta jaoker liasü.

Setong nung o jembiba mapang S Keoshu Yimchunger-i, Shamator nung aliba sempet aketba lanurtem atema maangka tajung agüja District level asayamung ka ayongzükba atema Shamator District

Volleyball Association nem tenüngsang agütsü.

Paisa, S.Yanba Showuba aser par kinunger dang asür Showuba bilemteta iba asayamung sponsor asüba atema tenüngsang agütsü. Asür Showuba ya Shamator jila nung mezünpur ka liasü, shibai Dobashi aser Head Dobashi ka ama district administration tenzükogo aser pa Shamator jila Hd. Gaonbura liasü.

Lanurtem den jembiba mapang Advisor-i, mapang mapang nung dang asayaba asayar ka masü saka tanen makai meranga inyaksü aser bendanga agüja asayatsü ajungshi. Paisa, lanurtem dang pei libaliro aziüoktsü ajungshi,

koba takok anguba asayar ka akümsü asoshi ajak dang tongtöbangtiba lir ta ashi.

Maneni paisa, asayar ka tekelok shisatsü aser shitemang anema alitsü asoshi teti practice asütsü aser anema alitsü asoshi jenjang tapet agitsü ajungshia liasü. Paisa, asayamung nung shilem agiba team 14 prongla dang takok tashi tajungtiba asayatsü merangtsü ajungshia liasü.

Iba sentong nung District Administration nungi ketdangsurtem, Col. J.P. Singh, Commandant AR. Shamator Battalion, lokti lenirtem, asür Showuba'er kinungertem aser jila nung alirtem aikati shilem agia liasü.

Tamim Iqbal BCB tekolakba kümogo



Rongchii/April 7, 2026 (Agencies): Bangladesh sorkari Mongolbarnü taoba mapang cricket asayar Tamim Iqbal Bangladesh Cricket Board (BCB) tir asütsü shimogo aser tang tinyakdak BCB board of directors loksatsüogo.

BCB tir inyaka alisang Aminul Islam Bulbul ya linük National Sports Council (NSC)-i agintsüogo, shirnoki election magi tashi iba asaya anogoshia inyakyim achaayanga atatsü asoshi ad-hoc committee ka tentetja liasü.

BCB-i bilateral tesendaktep asüngsashitsü atema BCCI dang mepishiba sülen anogo ishika lir tang BCB nung temelenshi adokogo.

Arishi küm 37 tain Tamim ya BCB tir rongung tanobusang lir, aser pa lenisüba nung züngsem 11 agi kümteba ad-hoc committee ya inyaksangshitsü,

kong taoba mapang Bangladesh captain Minhajul Abedin aser taoba mapang cricket asayar aser TV commentator Athar Ali Khan nata densema lir.

PTI sangdong ka ajanga ashiba agi, T20 World Cup mapang mepetmesü dak sendakba nung Bulbul ya mapa nungi aginogo. Interim sorkar advisor Asif Nazrul-i temelaba magütsüba sülen Bangladesh team taküm India nung T20 World Cup nung masayai liasü.

Mustafizur Rahaman IPL nung masayadaksütsü atema telemteba agiba anema Nazrul-i T20 World Cup nung Bangladesh team asaya Kolkata aser Mumbai nung asayatsü aliba ya Sri Lanka-i belener aotsü takhangba agüja liasü.

Iba mepetmesü atalokba tepeyong Bulbul-i kecha shilem magi-i repranga dang ata aser

taoba anogo ishika tsüngda pa mechi nung BCB director trok mapa nungi anenogo.

Taoba mapang Bangladesh captain aser linük nung opener rongnung tajungtiba Tamim Iqbal ya züngsem 11 agi kümteba ad-hoc committee tekolak asütsü shimogo. Parnoki achaayanga taruba anogo 90 tsüngda cricket board election agitsü.

NSC Director Aminul Ehsan-i ashiba agi, tang tinyakdak aliba BCB board loksatsü aser ad-hoc committee ka tentetba osang ya International Cricket Council (ICC) nem metetdaksüogo.

ICC charter ajanga board inyaksangshi nung sorkar nem jushidaksütsü memelar, ajisüaka ICC-i Bangladesh board nem tenokdangba magütsütsü imlar, kechiyong election agitsü atema NSC-i sangdongatokogo.

Züngsem 11 agi kümteba ad-hoc committee nung Tamim Iqbal (tir), Athar Ali Khan, Rashna Imam, Mirza Yasir Abbas, Syed Ibrahim Ahmed, Minhazul Abedin Nannu, Ishrafil Khusroo, Tanzim Choudhury, Salman Ispahani, Rafiqul Islam, Fahim Sinha nung densema lir.

USA striker Patrick Agyemang World Cup masayatetsü

Rongchii/April 7, 2026 (Agencies): USA striker Patrick Agyemang, Achilles tendon yiruba sülen pa taruba FIFA World Cup masayatetsü ta pa asayaba English ??club Derby County-i metetdaksü.

"Club-i Patrick nem medical teyari tajungtiba agütsütsü aser pa tanepsü bushiba tepeyong teyari agütsütsü," ta club sangdong ka ajanga Mongolbarnü metetdaksü.

English second-tier football league nung Derby atema asayaba mapang stretcher nung bener tuguba sülen Agyemang ya kidang World Cup asayatsü aliba nung asayatetsü masayatetsü mejangjai aküm.

Arishi küm 25 tain asayar ya Hombarnü English Championship asaya ka nung joka tur teku agi ball agizükba mapang ali nung junga majemokba sülen alanga liasü. Pa tetsüng tachichilen aleper tuguba mapang pa temulung kanga raksaba nguogo.

"Patrick yiruba ajanga tia maka pa taküm FIFA ??World Cup nung masayatetsü. Pa

koba mapang tashi ka nung tanepsü angutsü aji shia matatetsü," ta Derby-isa shisem.

Agyemang ya Derby pur Championship nungi promote asütsüsa asayatetba season nung tongtibang asayar ka lir. Pa taoba küm Major League Soccer nung Charlotte nungi oa adenba sülen pai goal 10 idaktsür lir.

Tawa international break mapang pa USA pur Belgium den asayaba mapang substitute ama asaya aser goal ka idaktsü aser Portugal dena asayaogo.

July ita 2025 Gold Cup nung semifinal aser final nung asayaba sülen pa tang mezüngbuba linük team nungi asaya liasü.

USA coach Mauricio Pochettino-i June 1 nü tashi nungbo World Cup squad sangdongtsüla. United States, Canada aser Mexico nungeri taküm iba asayamung ayongzükba asayatsü. USA team Group D nung Paraguay, Australia aser Turkiye den ata lir.

SSF World Cup: Palak, Mukesh nati gold medal angu



New Delhi, Rongchii/April 7 (Agencies): Granada, Spain nung rifle aser pistol atema ISSF World Cup nung India nunger asayartemi kanga junga asaya tenzükba shooter Palak aser Mukesh Nelavalli nati 10m air pistol mixed team event nung gold medal nguogo.

Kasa mapang nung tena senteper point 487.7 ngua world record tasen ka yangluogo, koba junior world record-a lir.

Qualification round nunga tenati kanga junga asaya liasü.

10m air pistol mixed team asaya nungsa China nunger Qianxun Yao aser Kai Hu nati point 484.8 ngua silver angu aser Hungary nunger Veronika Major aser Akos Karoly Nagy nati point 414.9 ngua bronze medal ngua liasü.

Gold medal round nung

Palak-i point 243.0 angu aser Mukesh-i point 244.7 ngua liasü.

Qualification round nung India nunger tarep ya China nunger tarep sülen tanabuba jenjang nung qualify asü.

Arishi küm 18 tain Palak ya mezüngbuba 2023 Asian Games nung asayaba mapang ajaki jangja aküm. Iba asayamung nung lai 10m air pistol individual event nung gold medal aser team asaya nung silver medal ngua liasü.

Laisa, 2024 Paris Olympics atema quota ka angu aser point 242.1 ngua Asian Games record ka yanglua liasü.

Kasa mapang nung Mukesh ya-a tanem tanemi India nunger pistol shooter tem rongnung tajungtiba ka kümдар. Pa ya junior world champion lir.

BILEMDANGANG

"Nükjidong makai renemshibaji amajok."